

四庫全書

集部

欽定四庫全書

全蜀藝文志卷十四

明 周復俊 編

詩

寺觀

遊三學山

隋僧智炫

秀嶺接重煙，嶽岑上半天。
絕巖低更舉，危峯斷復連。
側石傾斜澗，迴流瀉曲泉。
野荒青草凍，春來白鳥傳。
樹錦無機織，猿鳴詎假弦。
葉密風難度，枝疎影易穿。
抱裘依

閒沼策杖戲荒田遊心清漢表置想白雲邊榮名非我
願息意且蕭然

遊梵宇三學寺

唐王勃

香閣披青磴瑤臺控紫岑葉齊山路狹花積野壇深蘿
幌棲禪影松門聽梵音遽忻陪妙躅延賞滌煩襟

玄武山聖泉

有序

王勃

玄武山有聖泉焉浸淫歷數百千年乘巖泌湧接磴
分流下瞰長江沙堤石岸咸古人遺迹也茲乃青蘋

綠芰紫苔蒼蘚遂使江湖思遠寤寐寄託既而崇巒
左繞石壑前縈丹嶠萬尋碧潭千頃松風唱響竹露
熏空瀟瀟乎人間之難遇也方欲以林壑為天厲琴
樽為日用嗟乎古今同逝方深川上之悲少長同遊
且盡山陰之樂盍題芳什共寫高情詩得泉字韻曰
披襟乘石磴別籍宴深泉蘭氣薰山酌松聲韻野弦影
飄垂葉外香度落花前興洽林塘晚重巖起夕煙

附和前韻

明余子俊

予以左都御史成化丙午致政還青神丁未復召起
為夏官卿情知衰病不能圖報竊聞孔門家法於義
當不俟駕既而道出中江日且未晡因遊覽真靈觀
次韻賦此以自見時乃夏之五月望前一日也

青鞵布襪陟層巔望道其如未及泉天近尋常塵不到
旬當十四月猶絃山花亂落空壇裏野鳥閒啼古觀前
老我重來應指日山靈鄭重護寒煙

又和前韻

楊春

丹崖翠壁接雲巔玄武名山湧聖泉一水靜中拖綠黛
萬松深處響冰絃登臨恍訝崑崙頂倡和渾疑太華前
緬想昔人增感慨數聲啼鳥度晴煙

望牛頭寺

杜甫

牛頭見鶴林梯逕繞幽深春色浮山外天河宿殿陰傳
燈無白日布地有黃金休作狂歌老回看不住心

玉臺觀

前人

浩劫因王造平臺訪古遊綵雲蕭史駐文字魯恭留宮

闕通三峽乾坤到十洲人傳有笙鶴時過北山頭

暮登四安寺鐘樓寄裴十

前人

暮倚高樓對雪峯僧來不語自鳴鐘孤城返照紅將斂
近市浮煙翠且重多病獨愁常聞寂故人相見未從容
知君苦思緣詩瘦大向交遊萬事慵

題武擔寺西臺詩

段文昌

秋天如鏡空樓閣盡玲瓏水暗餘霞外山明落照中鳥
行看漸遠松韻聽難窮今日登臨意多歡語笑同

同前

姚向

開閣錦城中餘間訪梵宮
九層連畫景萬象寫秋空
天半將身到江長與海通
提攜出塵土曾是穆清風

同前

溫會

桑門煙樹中臺榭造雲空
眺聽逢秋興篇辭變國風
坐愁高鳥起笑指遠人通
始媿才情薄躋攀繼韻窮

同前

陽汝

清淨此道宮層臺復倚空
偶

闕

三伏外列席九霄中平

視雲端路高臨樹杪風自憐榮末座前日闕池籠

同前

李敬伯

臺上起涼風乘閒覽歲功自隨台席貴盡許羽觴同樓
殿斜暉照江山極望通賦詩思共樂俱得詠時豐

同前

姚康

松逕引清風登臺古寺中江平沙岸白日下錦川紅疎
樹山根淨深雲鳥跡窮自慚陪末席便與九霄通

西蜀淨衆寺松溪八韻兼寄小筆崔處士

鄭谷

松因溪得名溪吹答松聲繚繞能穿寺幽竒不在城寒
烟齋後散春雨夜中平染岸蒼苔古翹沙白鳥明燈分
僧影瘦光徹客心清帶梵侵雲響和鐘擊石鳴淡烹新
茗與暖泛落花輕此景吟難盡憑君畫入京

渠州沂江寺

前人

退居瀟洒寄禪關高挂朝簪淨室間孤島暫留雙鶴歇
五雲爭放二龍門輕舟共泛花邊水野屐同登竹外山

仙署金閨虛位久夜清應夢近天顏

題凌雲寺

司空曙

春山古寺遶滄波石磴盤空鳥道過百丈金身開翠壁
萬龕燈焰隔煙蘿雲生客到侵衣濕花落僧禪覆地多
不與方袍同結社下歸塵世竟如何

靈燈寺

薛能

莽莽空中稍稍登坐看迷濁變清澄須知火盡煙無益
一夜欄邊說向僧

武擔山寺

蘇頌

武擔獨蒼然墳山下至泉
鼈靈時共盡龍女事同遷
松栢銜哀處幡花種福田
詎知留鏡石長與法輪圓

利州北佛龕前重於去歲題處作 前人

重巖戴清美分塔起增標
蜀守經塗處巴人作禮朝
地疑三界出空是六塵銷
卧石鋪蒼蘚行藤覆綠條
歲年書有記非為學題橋

渠州冲相寺

崔塗

水流花謝兩無情，送盡春風過楚城。
蝴蝶夢中家萬里，子規枝上月三更。
故園書動經年絕，華髮春惟滿鏡生。
自是不歸歸便得，五湖煙浪有誰爭。

冲相寺渠州城四十里乃定光佛道

場此詩古老相傳是唐相崔塗僖宗時避亂至蜀所題
今無墨蹟存惟定光岩間有題云前進士崔塗由此間
眺望日乃歸

宿成都松溪院

李洞

松持節操溪澄性，一炷煙嵐壓寺隅。
翡翠鳥飛人不見，琉璃瓶貯水疑無。
夜聞子落真山雨，曉汲波圓入畫圖。

塵擁蜀城抽鎖後此中猶夢在江湖

題岳池縣集虛觀

呂洞賓

青蛇煉影月徘徊夜靜雲閑尚未來應是有人新換骨
暫留踪跡到天台

留題飛雲道院

前人

攜筇來此步飛雲踐滿賓塔綠蘚勻江上同歸共誰去
不堪回首不逢人

偶乘青帝出蓬萊劒戟崢嶸徧九垓我在目前人不識

為留一笠莫沉埋

凌雲寺二首

薛濤

聞說凌雲寺裡苔風高日近絕纖埃橫雲點染芙蓉壁
似待詩人寶月來

聞說凌雲寺裡花飛空繞磴逐江斜有時鎖得嫦娥鏡
鏤出瑤臺五色霞

題仙居觀

偽蜀杜光庭

往歲真人朝玉皇四真三代住繁陽初開九鼎丹華熟

繼躡五雲天路長烟鎖翠嵐迷舊隱池凝寒鏡貯秋光
時逢白鹿岩前往應許潛通不死鄉

題鴻都觀

前人

亡吳霸越已功全深隱雲林始學仙鸞鶴自飄三蜀駕
波濤猶憶五湖船雙溪夜月鳴寒玉衆嶺秋空斂翠煙
也有扁舟歸去興故鄉東望思悠然

題都慶雲觀

前人

三仙一一駕紅鸞仙去雲閑遠古壇煉藥舊臺空處所

掛衣喬木兩摧殘清風巔接猿聲近白石溪涵水影寒
二十四峯皆古隱振纓長往亦何難

聖母山祈雨詩

并序

宋潘洞

靈池縣東山下有朱真人洞洞北岡巔連屬逾二十
里得褚聖女祠化跡尤異民咸事之予出宰之次月
邑中苦旱於是潔誠薦禱希恩於二像之前曾未三
日甘雨大澍民欣其應式歌且忭仰荷明靈之垂祐
作詩以記之

錦里城東邑高原十六鄉江流分不到天雨降為常

並部

十縣多引江水溉田咸為沃壤唯靈池
疏決不到須候天雨俗謂之雷鳴田

節及三春後晴

逾兩月強龍乖尋穴蟄魚困入泥藏樹影全虧綠苗姿

半吐黃耕夫皆慘戚市戶亦蒼忙潛慮冤無雪深疑政

有傷推恩慙睿主引咎謝虛皇磬折真人字星奔聖女

堂先時蠲玉饌隔夜浴蘭湯洞口焚香遠山椒作梵長

幽誠期必達玄應果旋彰雷振南峯下雲飛北嶺傍聲

稠喧竹塢勢迫瀉銀潢颼灑連三晝滂沱遍一方稻畦

煙漠漠荷沼水泱泱物態涵優渥民情遂樂康
洪施周庶品餘潤決他疆稔歲還堪待陰功詎可忘
明靈何以報奮藻紀遺芳

集海雲鴻慶院

宋祁

地勝祠仍古春餘物徧華山雲時抱石佛雨不萎花嶺
挾樓梯峻巖牽殿城斜淙谿雜環珮怪蔓走龍蛇跌
坐僧飛鉢香園客戲沙吾游真草草深意寄青霞

再遊海雲寺作

前人

十里雲邊寺重驅千騎來天形歌野盡江勢讓山回園
木濃成幄樓鐘近殷雷斜陽歸鞅促飛蓋冒輕埃

遊昭覺寺

范鎮

炎蒸無處避此地忽如寒松砌行無際石房禪自安
鴛秋沼漲蝙蝠晚庭寬登眺見田舍衡茅半不完

淨衆寺新禪院

前人

金地四郊外一來煩慮攄凡逢似仙境鮮不屬僧居岸
綠見翹鷺溪清無隱魚殘陽已周覽欲去幾躊躇

新繁縣顯曜院

梅摯

繡地縈回寶勢長，遍遊寧倦徙胡牀。
譯齋不顧幡風影，講席亂飛花雨香。
苔陣暗連僧榻古，蕉旗低映佛窗涼。
我來懶上東臺上，目送霜楸感北堂。

姚親松檟在院東數里故云

和韻

王益

梵宇蕭條白日長，談空揮麈接藤牀。
雲章酷愛休詩麗，蓮柄慵思遠社香。
石髮雨梳雞苑寂，風梭春織鷺山涼。
劫灰心火銷平盡，又聽鐘聲下講堂。

留題重光寺羅漢院贈憲上人

梅摯

人盡遊方證佛心
師心無著外三乘
蓮花結社新吟遠
玉紙抄經舊價騰
藥杵半和鈴索響
茶煙輕共衲雲蒸
我來與話高僧事
冷笑支公學養鷹

和

王益

曉剃吟髭雪半零
海幢曾呪鉢龍醒
蚤同西竺能持法
應笑南僧不會經
雲氣晝閒侵塵柄
蘚痕春老上銅瓶
近來禪觀都無語
手指餘花滿寺庭

留題清涼院

王益

背倚青風面枕溪，濡毫新向壁間題。
善根不斷金蓮合，淨界無塵水月齊。
會啓茱萸真樂境，花開薝蔔遠香畦。
因思祖塔嘗遊處，更在龍盤虎踞西。

金陵有龍盤虎踞城西偏

和

梅摯

一水明如罨畫溪，清涼佳勝古標題。
香隨講雨天花爛，聲入幡風地籟齊。
暫到已能知覺路，縱遊何必理禪畦。
謝公公退多行樂，五里鳴騶出縣西。

送戴蒙赴成都玉局觀將老焉

蘇軾

拾遺被酒行歌處野梅官柳西郊路
聞道華陽版籍中
至今尚有城南杜我欲歸尋萬里橋
水花風葉暮蕭蕭
半畦徑尺誰能盡
榿木三年已足燒
百歲風狂定何有
羨君今作峨眉叟
縱未家生執戟郎
也應世出埋輪守
莫欺老病未歸身
玉局他年第幾人
會待子猷清興發
還須雪夜去尋君

護國寺詩

張天覺

薄宦區區可歎嗟
寂寥寒館過村家
神錐豈向囊中出
寶劒聊憑醉後誇
就祿勉持毛義檄
讀書空滿惠生車
掩關不識青春好
一夜狂風已落花

外大父丞相初登科為雒縣主簿經攝圉密鎮
稅官留詩護國寺中令狐監征錄以見寄謹
再拜追和而記其後

何麒

傳翁遺墨剩咨嗟
四海當年尚一家
大老不為今日用
小詩徒遣後人誇
興來思跨巴滇馬
歸去方乘下澤車

燕麥兔葵僧舍裏何如夢得訪桃花

此篇以和韻故兩見不以共次為序

題雙流保國觀古栢

胡宗師

孔明廟前古栢奇此木氣象尤過之
榦東髣髴煙焰起
鐵龍空駕焚一枝真人丹成何所適
世傳乘鶴冲天飛
求詩道士心彌堅試聽一誦工曹詩

清曉坐四天院

喻汝礪

杳杳天宇涼月墮星亦稀
朝輝下簷隙遠色開林扉
寂坐無物役隱几或在斯曠焉耳目清
擬覺形神歸混世

迹若近抱冲心獨微故殿今幾年何人所摹規當時亦
姱哉作者良已罷快意取一好於身亮何私不知壯觀
地徒使來者悲坐頃又成昔安知今是非

龍華大像蓋冀國夫人所作因成兩絕

何耕

慧性元從戒定薰百花潭水浣僧裙箇中力量真超絕
故老尚傳娘子軍

生男箇箇欲如娘婦女軍中氣不揚試問爭功瞋目士

幾人能敵浣花娘

普通山距府東十數里青州禪師洪杲道場也
自龍華歸過之棟宇頽落僧徒鄙野良為可
惜是夜雨大作因書所聞所見為長韻

前人

錦城之東山培塿突起伽藍壓山口入門氣象頗不凡
在昔規模定非苟黃絹碑詞著眼看

侯溥作碑記
本末頗詳

青州

老衲知名久自披榛徑結茅屋不剪霜鬢散蓬首市門

有女奉巾盥衣械無花生穢垢

府娼道王從師落髮人或譖之於王建建鞠之

竟無他

至今一轉鵲鵲語

蜀人呼鵲鵲為連點點有問師者云如何是連點點師云屈指

數不及既既無蹤跡故云

散作諸方師子吼祖燈寂寞何人繼宰堵

岩堯惟鬼守法席草長深沒膝僧榻屋穿光見斗似聞

占籍多衍沃

此山寺常住田聞亦不薄

合選名緇振頽朽我來不覺

三歎息眼底盡空諸所有自開丈室掃塵空聊寄門眠

憇奔走夢回中夜雨鳴簷卧聽東風寒入牖曉來散步

轉山脊好語相呼聞野叟抽芒已見麥翻浪餅餌懸知

香隴畝須臾日影散林樾絢爛春光被花柳僕夫催歸
屢不應景物流連寧忍負出山騎馬更躊躇乘暇應須
重載酒

青羊宮

按趙閱道成都記載宮乃老子
乘青羊降其地今有臺存焉

前人

一載官錦城咫尺望琳宮未始得得來正隨役役中今
朝弄晴雨策蹇隨春風頗愛意象古停驂小從容縹緲
百尺臺突起凌半空憑欄俯脩竹決眚明孤鴻信哉神

仙宅不受塵垢蒙稽首五千言衆妙一以通靜觀萬物
理豈假九轉功區區立訓詁亦哂河上公癡人慕羽化
心外乘鴻濛要騎白鶴背往訪青羊蹤

暇日與陳楚材遊四天王寺見五髻文殊畫像
于廡下剝落可惜遂以告羅宗約參議遷之
正法禪院俾長老惠公龕而祠之為詩十四
韻書其事

前人

陳侯招我古寺行破椽老瓦煩枝撐丹青巨壁置廡下

大士五髻影華纓旁風上雨塵土集意象落莫無光晶

近前諦視乃名筆妙處不減本與瓊

成都名畫多張惜南本范瓊之筆

哉此地非所託走卒嘈雜兒童輕西鄰塔廟頗雄偉彌
天老惠新主盟撞鐘擊鼓五千指分坐豈無三尺楹何
人堪作不請友參謀行解俱圓明從容試以語二士曰

此甚易非難成便從遊戲出三昧各借一臂相扶擎騰
空似赴遠公約散花如入維摩城都人改觀香火肅雨
淚膜拜爭投誠主人更存好看客永為道伴終生平莫

言有我不須你留取眉毛遮眼睛

登道觀

張浚

蒼髯野褐予甚古
蘿月桂風誰為貧
當戶蛟龍森漢柏
隔江鷄犬隱秦人
好山如畫能留客
寶鼎藏丹不計春
更上高亭問玄鶴
莫教詩眼有纖塵

遊三井觀

陸游

三井舊知名暇日偶一訪
棟宇壞欲盡基址尚闕壯
畫墻皆國工煙雲儼天仗
旌旄亞戈戟佩玉雜弓韞
太平

實傑作筆落九天上吳生名擅世睥睨未肯讓規模遠
有考意象豪不放最奇老癯僂骨立神愈王石格雖少
怪用筆亦跌宕兩姝淡蛾眉非復火食狀塵埃久侵蝕
風雨無蓋障好事未易逢寧能久亡恙雍洛劫灰餘妙
迹盡凋喪斯遊恐難繼佇立增悽愴

觀華嚴閣萬僧會齋

前人

拂劍當年氣吐虹
喑鳴坐覺朔庭空
早知壯志成癡絕
悔不藏名萬袖中

飯昭覺寺抵暮乃歸

前人

自墮黃塵每慨然
攜兒蕭散亦前緣
聊憑方外巾盂淨
一洗人間七箸羶
靜院春風傳粥鼓
畫廊晚雨濕茶煙
潛光寮裏明牕下
借我逍遙過十年

謁凌雲大像

前人

出郭尋幽山色新
徑呼艇子載煙津
不辭疾步登高閣
却欲今生識偉人
泉鏡正涵螺髻綠
浪花不犯寶趺塵
始知神力無窮盡
丈六黃金果小身

光相寺

范成大

峯頂四時如大冬芳花草春自融苔痕新晞六月雪
木勢舊偃千年風雲物為人布世界日輪同我行虛空
浮生元自有超脫地上可憐悲擡蓬

曉詣三井觀

前人

路轉市聲遠寬閒古城東適從紅塵來忽入蒼煙叢
心傾濃露芋葉翻微風秋陽澹籬落殘暑不必攻野老
熟睡起日高首如蓬官身騎官馬君應笑龍鍾

題鶴鳴化上清宮

文同

秘宇壓孱顏飛梯上屈盤清流抱山合喬樹夾雲寒地
古芝英折岳秋石乳乾颺輪遊底處獨自立層壇

青山丈人觀

前人

羣峯垂碧光下擁岷僊家神皇被金巾坐領五帝衙威
靈攝真境俗語不敢譁精心叩殊庭翹首仰紫華願言
佩仙籙畢世驅塵邪循奉藥珠戒期之飛太霞

蒼溪山寺

前人

正午風色高遂泊蒼溪縣層崖抱林木有寺藏蔥蒨出
船步危磴陰密頗縈轉上到金僊家緣空列臺殿修篁
間疎桐坐覺炎暑變老僧曉經論言語何貫穿引我上
高閣闌下俯江面寥寥百里內山水盡奇觀誰謂羈旅
中所見皆所願汀州白鳥聚井邑青煙散樂此暮忘歸
踈鐘起崑畔徙倚下松門尚怪舟人喚

資州路東津寺

范祖禹

山行無晨暮日暝崖谷昏哀猿落客淚永路驚旅魂憑

陵高山巔俯視大江奔迴環島嶼合縈轉洲渚屯行雲
赴楚天飛鳥下蜀門地遐怪物聚寺古深殿存憶昔李
氏末煙塵暗中原姦雄競草竊割據穹海根干戈百年
後見此敗屋垣我來屬清秋登覽無俗喧山深虎豹歸
水靜蛟鼉騫臨風獨笑叱浩蕩欲飛翻

遊長松寺宿石門僧舍以石門霜露白為韻得

露字

楊甲

疾風吹輕衣駕我雲脊路人間一回首驚絕不敢顧鳥

投虛無底渺渺不知處蜂窠蟻丘垤與世同所驚試看
一蒼莽誰有不平慮尚憐野僧屋佛面荒苔蠹斷崖劃
牙吻洶洶崩石怒我來得奇觀拄杖叩巖樹青山有驕
色欲回俗客步平生二三子慰我一相遇娟娟松間月
幽夕亦可度夜闌更小語風逼遺響去酌君無多酒繼
以木蘭露

登安福浮屠以高標跨蒼天為韻得跨字

前人

誰能於虛空千仞擢脩架層梯高寥寥可歷不可跨疑
從地上湧幻手聊一化飛龍送千柱雷雨天一借巍巍
大勝妙突兀此其亞道人豈澄觀佛事了閒暇指揮三
百尺斤斧隨叱咤當時奮赤手意闊已遭罵後來見奇
特世眼一驚詫塹山作平地海闊梁可駕哀哉耳目陋
未信猶疑嚇凌高更回首落日在雲罅蒼蒼野浮樹漠
漠水分汊悲涼豪傑窟野冢埋王伯百年眼前是俛仰
閱榮謝惟當快飲酒醉聽風鈴夜

宿安靜觀

前人

青山轉龍脊，矯首西南天。
上有仙人祠，臺殿飛後前。
下見雲雨興，樹色暗平川。
仙人兩黃鵠，一去無歸年。
向來道上屨，人著幾何錢。
一朝聞羽化，悵望空流涎。
却揮囊中金，瓦礫來投捐。
巖巖化金碧，香火通雲煙。
人間萬事爾，旦暮有愚賢。
而況爭奪場，轉手分媼妍。
仙人一回首，破隴與荒阡。
紛紛不足道，衰此區中緣。
石泉瀉幽澗，意寂不肯傳。
夜聞松風露，起坐心寥然。

朱真人祠

前人

一濯巖下溪再拜巖中庭清風蕭然來吹我衣上腥仙人芙蓉冠乘月下雲軿山空雜佩響靜夜朝百靈似聞客欲去小語猶丁寧肅肅上松栢急以兩耳聽寂寥古壇外但掛斗與星天明恐是夢恍惚遺心形去飲石上水再讀幽人銘青山無行迹露雨松冥冥

游呪土寺西臺

蒲瀛

偶到城西寺人言呪土墳夕陽臺半出秋草徑才分地

下無紅粉天邊有碧雲徘徊追往事風急葉紛紛

夏日過莊嚴寺僧索詩為留三絕拉舍弟同賦

晁公休

十里溪橋梵宇新那知陌上漲紅塵老僧苦欲題新句
認取維摩是故人

病起支離倚瘦筇幅巾芒屨竹陰中聞蟬大有新秋意
一扇清涼一榻風

機杼聲中禾稻肥疇瓜區芋綠成畦田家樂事今如許

何日邊城息鼓鼙

雲安玉虛觀南軒感事偶書五首

杜東之

二儀設爐冶四山塞氛煙豈惟草木焦坐恐土石燃巴
峽再不登逡巡又無年流殍竟何歸卒死填溝淵哆吻
魏佛狸積粟窺淮壩僥倖逢水旱乘飢擾吾邊小人不
及夕妄憂杞國天敢謂赫赫楚而無為賈賢

古觀久荒涼寂然外人境草木既蓊蕪風雨亦頽隕我

來一糞除地淨窗為迴晨光散桐陰夕照落栢影置以
六尺牀度此三伏永終朝饜清涼半夜或淒冷客至共
浮瓜睡餘獨煮茗遙聞斗筭兒爭奪沸蛙黽街頭米價
昂汲井費縻綆對我脫粟盤徐餐休祝鯁

穉梧殖歲首擢起青琅玕其葉大如掌其陰勻若攤弱
幹尋丈展氣已雲霄千期之四五載定足容栖鸞我老
無定居僦屋蝸螺跼平生輞川宅面勢胸中盤何當遂
誅節中庭十步寬非無松栢堅未易蒼龍搏種此南窗

下醉眠風雨寒

嗟余何不辰備極生人凶偶全摺脅范屢脫南冠鍾再
醺亦何為孫枝發枯桐鬼猶果求食寧吐殺與豐兩兒
如我長無田學圃農鄭忽敢辭昏冗食衰乃翁茲外尚
難言二女累喬公荆笄嫁不售誰論德與容幼也抱奇
疾比歲日疴瘥亦既就膏肓二豎不可攻而我事奔走
過家如狂風豈無浹旬留奈此旦夕春吞酸一執手別
去猶飛蓬心知不再見衰淚紛無從書來報哀訃齋恨

歸蒼穹莫聞忍死言藁葬蓮花宮為父我安忍為兒汝
何逢興言一及此鏃刃戕心曾

念我蓄一櫛間闢走西東攜持三十年出處靡不同朝
梳帶殘月暮理含清風戶樞既日運何由生蠹蟲今晨
無故折脆響猶春葱物理有定數吾生得無窮即事感
百慮撫躬悲一翁空囊乏贖鐵鬧市多良工驚膠隨渺
茫秋扇慚初終從渠老齒豁稱我醉顛童

至自雲安題淨戒院二首

前人

山口出雲鵲喚雨三月巴山蒸溽暑濁流來作虎眼文
一葉孤舟命如縷道傍綠樹清陰涼中有金仙古道場
去家纔餘二百里且復看此青篴當出門滿目傷羈旅
歸舍還煎碎兒女欲問闍黎借榻眠卧對龕燈淡無語
麥芒焦桑椹紫田家夫婦忙欲死死蠶入簇麥登場夫
婦飽煖孰可當道傍書生空有婦不蠶而衣真汝負功
名富貴老不來書劍風塵一生悞何時即買百株桑身
耕婦織策最良董生莫厭徵租吏蘇子無由黑貂敝

題草堂寺

前人

草堂禪寺北山陞想見鳴騶入谷時
猿鶴如懷海鹽令
魚龍猶護紹興碑
排岩樹老秋來早
上殿僧稀曉散遲
我亦於今抗塵土
臨風慚讀孔璋移

題西門外笮橋下觀音院

仲昂

雨砌風亭長綠苔
壁間題字半塵埃
城南蕭寺無人跡
幾度曾因送客來

遊定林院

岑象求

野濶蓮宮迥樓臺半倚山地連巴峽近門對漢溪灣柏
徑松煙濕岩房雨蘚斑白雲邀客至明月伴僧閒經梵
喧譁外香燈杳靄間勝遊成邂逅危構喜躋攀世路長
何極塵心久欲還輜車正催發緩步出重關

遊金泉觀

李宏

昔時謝女昇天處此日遺蹤尚宛然蟬蛻舊衣留石室
龍飛勝地湧金泉碑書故事封蒼蘚殿寫真容鑱翠煙
薄暮松巔聽鶴唳猶疑髣髴是神仙

下岩寺

郭印

雲安欣反境小刹為徘徊殿閣隨岩轉軒窗向水開僧
雖持鉢出客自艤舟來欲往無留計幽懷亦暢哉

過玄天觀

明定園

福地喜重來登臨亦快哉蓬壺連海島雲洞隔塵埃羽
客乘鸞去仙人駕鳳回談玄閒坐久欲去且徘徊

題玄天觀

張三丰

等門釣罷海中鰲一笑歸來祖晉陶花吐碧桃春正好

筍抽翠竹葉還高心懷鳳闕龍鱗會身寓龜城馬足勞
何必終南論捷徑宦情於我似鴻毛

吳永齡千戶許載酒請州佐秦侯及諸友遊西

岩寺久不踐約秦以詩戲速之依韵同作

吳伯通

瑪瑙古城北禪房倚巖巖俯瞰萬里江仰蔭千年杉我
昔乘槎行遙望石壁巉青雲路正長蘿徑無緣芟今將
航宦海興動東征帆聞君有成約速客勞飛函中宵起

待旦秣馬催羈銜言馬出自食大笑將軍饒坦坦秦大
夫嘲詩屢題絨調高更寡和情至元非詬

宿玉蟾寺

吳廷舉


川北湖南一水通生涯半寄祝融峯此身尚逐雲來往
又掛玉蟾山上松

過千佛巖和察罕廉訪韻

劉成穆

丹壁蒼巖青鐵楹巖頭古溜苔蘚生千年刻畫魚龍擁
白日陰冥麋鹿行金草細搖蘿洞冷玉魚橫過石梁清

臨流古樹看心折野寺殘碑月二更



全蜀藝文志卷十四

欽定四庫全書

集部

全蜀藝文志卷十五

六

詳校官閣中書_臣李采

侍讀_臣孫球覆勘

總校官進士_臣繆珙

校對官中書_臣李荃

謄錄監生_臣徐紹城

欽定四庫全書

全蜀藝文志卷十五

明 周復俊 編

詩

懷古

八陣圖

見唐語林

晉桓溫

訪古識其真尋源愛往跡恐君遺事節聊下南山石

蜀四賢詠

宋鮑照

渤渚水浴鳧春山玉抵鵲皇漢方盛明羣龍滿階閣君

平因世間得還守寂寞閉簾注道德開卦述天爵相如
達生旨能屯復能躍陵令無人事毫墨時灑落褒氣有
逸倫雅續信炳博如今聖納賢金璫易羈絡良遮神明
游豈伊覃思作玄經不期賞蟲篆憂散樂首路或參差
投駕均遠托身表既非我生內任一作甚豐薄

登琴臺

梁簡文帝

蕪階踐昔徑復想鳴琴游音容萬春罷高名千載留弱
枝生古樹舊石染新流由來遞相嘆逝川終不收

蜀城懷古

劉希夷

蜀上遶水行吳天積風霜窮覽通表裏氣色何蒼蒼舊
國有年代青樓思豔粧古人無歲月白骨宜丘荒寂歷
彈琴地幽流讀書堂玄龜埋卜室采鳳滅詞場陣圖一
一在柏樹雙雙行鬼神清漢廟烏雀叅秦倉歎世已多
感懷心益自傷賴蒙靈丘境時當明月光

巫山懷古

前人

巫山幽陰地神女艷陽年襄王伺容色落日望悠然歸

來高唐夜金缸焰青煙顏想臥瑤席夢魂何翩翩搖落
殊未已榮華忽徂遷愁思滿湘浦淒涼雲夢田猿啼秋
風夜雁飛明月天已歌不可聽聽此益潺湲

白帝懷古

唐陳子昂

日落滄江晚停橈問土風城臨巴子國臺沒漢王宮荒
服猶周甸深山尚禹功巖懸青壁斷地險碧流通古木
生雲際歸帆出霧中川途去無限客坐思何窮

陳拾遺故宅

杜甫

拾遺平昔居大屋尚修椽悠悠荒山日慘澹故園煙位
下曷足傷所貴者聖賢有才繼騷雅哲匠不比肩公生
揚馬後名與日月懸同遊英俊人多秉輔佐權彥昭超
王儼郭振起通泉到今素壁滑灑翰銀鈎連盛事會一
時此堂豈千年終古立忠義感遇有遺編

漢州月夕遊房太尉西湖

李德裕

丞相鳴琴地何年閉玉徽

房公以好琴聞于海內

偶因明月夕重

敞故樓扉桃李蹊空在芙蓉客暫依

南史安陸侯與王仲玉長史庾杲之書

稱泛淥水依芙蓉何其麗也

誰憐濟川楫長與夜舟歸

重題

前人

晚日臨寒渚微風發櫂謳鳳池波自闊魚水運難留亭
古思宏棟川長憶夜舟想公高世志祇似冶城遊

奉和

劉禹錫

太尉留琴地時移重可尋徽絃思掩抑風月助登臨榮
駐清油騎高張白雪音祇言酬唱美良史記王箴

重題

李德裕

靜對烟波夕猶思棟宇清臥龍空有處馴鳥獨忘情顧
步襟期遠參差物象橫自宜雕樂石爽氣際青城

奉和

劉禹錫

木落漢川夜西湖懸玉鉤旌旗還夜次舟楫泛中流目
極想前事神交如舊遊瑤琴久已絕松韻自悲秋

重題

李德裕

林端落照盡湖上遠風清水榭芝蘭室仙舟魚鳥情人
琴久寂寞烟月似平生一泛釣璜處如聞流水聲

房公舊竹亭聞琴緬慕風流神期如在因重題

此作

李德裕

流水音長在青霞意不傳獨悲形解後誰聽廣陵絃

奉和

鄭谷

石室寒飈警孫枝雅器裁坐來山水操絃斷弔餘哀

奉和

劉禹錫

尚有竹間露永無碁下塵一聞流水曲重憶滄霞人

經杜甫舊宅

雍陶

浣花溪裏花多處為憶先生在蜀時
萬古只應留舊宅
千金無復換新詩
沙崩水檻鷗飛盡
樹壓村橋馬過遲
山月不知人事變
夜來江上與誰期

觀八陣圖

劉禹錫

軒皇傳上略
蜀相運神機
水落龍蛇出
沙平鵝鷺飛
波濤無動勢
鱗甲避餘威
會有知兵者
臨流指是非

詠張柬之

柬之曾為蜀郡守今崇慶州也

皇甫澈

周歷草元命
天步值艱阻
烈烈張漢陽
左袒清諸武
休

明神器正文物舊儀觀南嚮翊大君西宮朝聖母茂勳
鑄鐘鼎江山食茅土至今稱五王卓立邁千古

詠鍾紹京

紹京曾謫
守蜀州

前人

清宮閭闔啓滌穢氛泯紫陌重昭回皇天新日月從
容廟堂上肅穆人神悅唐元作命功輝煥何烈烈

武擔

蜀事補亡

宋宋京

君不見蜀王妃子墓突兀成都城中若山積墓頭寒鏡
澁無光妬月欺煙化為石鴻荒無根馮野史直謂山妖

化妃子臨終未免懷

關

運土山中葬於此

關

錦江邊用是得名

關

空翠老大

關

穴西山出捲簾化

關

如

汲冢書免使後人疑往昔

龜化

蜀事補亡

前人

君不見秦時張儀築少城土惡易敗還顛傾力疲智竭
築未就神龜為爾開其靈龜行所至城不圯板築之功
從此已功成隱去智且賢城下于今祇流水殷勤高謝

余且網不夢元君寧自放儀兮儀兮奈爾何口舌縱橫
飾欺妄天使神龜籠爾術不言而行功自畢安得人靈
若爾靈照見百為心暇逸

禮殿

蜀事補亡

前人

君不見漢人制作禮殿存法度嚴廣分卑尊祇今年數
不可考列畫古帝丹青昏晉人遺書刻柱邊字畫刊缺
骨氣全衣冠真不異闕里事業直笑銘燕然鏘鏘似有
環珮聲七十二子羅簪纓閉藏濁世如有待開眼今日

觀文明陳倉石鼓歸辟雍大成門闕何穹崇安得貌取
禮殿制太學西有宣尼宮

石室

蜀事補亡

前人

君不見西漢文翁為蜀守蜀學不居齊魯後諸生競欲
保翁名石室鐫磨貴難朽東漢高公又幾時作為石室
還如茲至今二室堅且久文公高公名不衰世間可傳
唯鐵石石終可裂鐵終蝕古人好事留其名石室存亡
竟何益漢水沉碑知在不叔子名存空峴首安得眼看

石室銷要知二字名終有

王局

蜀事補亡

前人

君來見青陽老人飛下天口宣至道朝羣仙地中神人
捧玉局異事秘怪于今傳龜城坤隅地有穴俗說西與
岷山連嵯峨古觀森偉像老柏慘澹含風煙令威已去
城郭在人物自改名依然亳州宮庭煥星斗真皇行幸
祥符年所託得地近京邑地獨隱晦遐方偏安得老人
洗此心還我澹泊同古先

嚴真

蜀事補亡

前人

君不見莊遵賣卜成都市市中仙隱無人值百錢度日
復何求猶有沉冥見文字不因問著牛女星下世安能
知姓名雲中鷄犬拔家去舊宅寂寞秋蕪平措磯石在
年年長藥鼎空留閉黃壤前時發掘篆籀新明水神丹
光滉瀟金鴈橋邊臺觀存神仙遺事渺難論安得先生
為我卜俗骨庶可窺天閤

琴臺

蜀事補亡

君不見成都郭西有琴臺長卿遺跡埋黃埃千年免為
狐兔窟化作佛廟空崔嵬黃鬚老人猶記得昔時荒破
樵蘇入鉏犂畏淺牛脚蹴古甕耕開數逾十乃知昔人
用意深甕下取聲元為琴人琴不見甕已掘唯有烏雀
來悲吟一朝風流隨手盡況復千年何所訊安得雄辭
弔汝魂寂寞秋蕪耿寒燐

墨池

蜀事補亡

前人

君不見子雲草玄西郭門一選秋草閒朝昏何須筆冢

高百尺池墨黯黯今猶存
童烏侯芭竟零落玄學無人
終寂寞漢家執戟知幾年
垂老身投天祿閣俗兒紛紛
重劉向思苦言艱動嘲謗
漢已中天雄亦亡不較空文
從覆醬如今却作給孤園
吐鳳亭前池水寒安得斯人
尚可作會有奇字令君看

書臺

蜀事補亡

前人

君不見孔明書臺遺廟旁
古書不見臺荒涼臥龍未起
蜀天遠茅廬日日空
南陽赤符光寒白水涵秣陵王氣

猶能作璋若嬰兒操虎狼脫去荊州殊不惡十倍奇才
安用書此臺昔時知有無蜀人思君識故處未若江水
存兵圖黃冠所居門第改祇有臺名今尚在安得臺邊
見古人秋草重生類書帶

草堂

蜀事補亡

前人

君不見少陵草堂背西郭浣花溪水流堂脚竹寒沙白
自淒涼莫問四松霜草薄入門好在烏皮几公去不歸
換鄰里西嶺千秋雪木消舍北泥融飛燕子祇今檜木

平橋路籠竹和煙雜江霧野僧作屋題草堂不是柴門
舊時處詩壇今古誰能將艷艷文章光萬丈安得英才
擅品量當使公居摩詰上

訪古

房偉

訪古城西話劫灰子雲相如安在哉成都萬事變亦盡
惟有石笋雙崔嵬

遊山上廢寺有段文昌種松石刻云乾坤毀則
無以見寺寺不可毀四松其遠乎寺今廢木

亦亡矣感而賦之

楊甲

木落石出荒山臺上有佛寺孤崔嵬斷椽碎瓦無四壁
古佛已倒何人推野蜂占窠挾肩背山鼠出穴銜髻懸
老僧見我欲愁哭野葛蔽路官能來文昌種松有斷刻
石柱半裂荒莓苔舊時老翁無一在獨樹晚出非耆鮐
乾坤未變已先滅幾見賊火譟征雷至今野叟鑿山破
石窟尚有龍筋骸當時手種意已遠欲與草木為渠魁

八陣磧

蘇軾

平沙何茫茫髣髴見石筴縱橫滿江上歲歲沙水齧孔
明死已久誰復辨行列神名非學到自古不留訣至人
心已悟後世徒妄說自從漢道衰蜂起盡姦傑英雄不
相下禍難久連結驅民市無煙戰野江流血萬人賭一
擲殺盡如沃雪不為久遠計草草常無法孔明最後起
意欲掃羣孽崎嶇事節制隱忍久不決志大遂成迂歲
月去如瞥六師紛未整一旦英氣折惟餘八陣圖千古
壯夔峽

八陣碛

蘇轍

漲江吹八陣江落陣如故我來苦寒後平沙如匹素乘
高望遺迹磊磊八十四遙指若布碁就是不知處世稱
諸葛公用衆有法度區區落囊斜軍旅無濶步中原竟
不到置陣狹無所茫茫平沙中積石排隊伍獨使後世
人知我非莽鹵奈何長蛇形千古竟不悟惟餘桓元子
久視不能去

灘石八陣圖行

王剛中

我生孔明後相望九百載我想孔明賢巍然伊呂配奇
謀勇略號雄師大節英風蓋當代木牛流馬何足言八
陣遺蹤千古在我行已度瞿塘門長灘石壘參差分洪
纖高下尺寸等猶有當年節制存四頭八尾觸處首敵
衝中央兩皆救握竒如樞運無窮七縱七擒仍敢攻規
模黃帝已垂文後來得者惟將軍唐宗李靖拾遺意樂
舞旂表徒續紛長江之上石蟠結江波洶湧石不滅使
君何事遽剗除一夜風雷吼天闕明朝依舊石縱橫神

物護持人始驚向來守蜀用此法誰知石壘真金城嗟
乎孔明遇不遇遇則劉公恢大度國險地狹民力微法
出萬全勢未具嗟乎孔明以此用於吳長江內固魏可
圖嗟乎孔明以此用於魏掃平三分歸一篡祇應所遇
勢不同勢既不同功亦異嗟乎孔明之心如石堅欲扶
漢室還中原事之不就則天耳安肯俯首從曹袁嗟乎
孔明如生石不老後世用兵無草草忽然變作六花看
使夫中原難按考請觀壘石韜機籌江流東去自悠悠

英豪得此石外指長與君王靖邊壘

觀八陣圖有感

李興宗

江從岷來觸瞿塘夏潦潰烈怒勢張霜溝水落洲渚露
纍纍江石堆作行半斜半直半踈密方營周匝門東出
相傳呵護有鬼神驚波不能移寸尺想見當年諸葛公
綸巾羽扇揮愁風令嚴部伍寂如水出沒變化機無窮
乾坤不足當經理寫留古法良岑趾上灘下峽一千年
多少英雄測玄旨小兒元子強多知常山蛇勢吾能窺

溺上枋頭真絕倒空使虬髯論屈奇斷輪不可傳其子
此公天機絨骨髓奈何螟蝗生蝮蝎炎劉已灰吹不起
天教三馬食一槽老馬蹄嚙暫咆哮渭陽中憫勢將蹶
大星夜隕西軍號嗚呼興廢盡天意中原擾攘今六紀
不堪骨肉自相殘欲拯塗炭嗟誰使大官酣燕芻豢餘
小官跼蹐塵埃裏舉目厭厭九泉人誰訪草廬談世事
向來韜畧機莫投而今投機欠良籌君不見峽山深深
茅舍底有人抱膝高聲謳

奉陪安撫大卿登八陣臺覽忠武侯諸葛公遺

像偶成長句

張縝

白帝城西魚復浦十月江平見津滸當年累石紛成行

此地臥龍經講武轅門外建儼中權

陣有壁壘一門東出

列陣相

承存後伍

八陣相承又列數陣于後

何人蛇勢識常山未數魚麗矜

鄭拒懸知精神貫金石尚想號令嚴鉦鼓老兵料敵應

疑生川后澄波其敢侮向令亦伏有餘符下睨皇州真

指取云何遺跡司神明獨新豐功被寰宇高城置酒共

臨眺往事興懷增嘆撫巍然王佐三代前信矣名言照千古

巨擘李訖謁丞相祠登開濟堂俯八陣圖覩新
帥張卿與侍郎林公舊題倡和皆慨想當時
英烈嘆誦久之惟灤東流嚙城入江且為民
病願以不能轉石者一轉茲水輒借韻賦之

前人

人言忠孝不磨滅神物護持以終古千年陵谷幾變遷

此石不後自章武本由黃帝占兵法六十四以八為
伍髯孫且懼生達走賊操遊魂何敢拒刻露銘沙狀
水底教戰石存山下鼓山下有石鼓相傳為教戰之鼓一片丹心天
地開萬世間風猶禦侮我來起敬凜如生再拜一言
公必取瀼流東截陣圖前寢隳城壁頽民宇能安拳
石止波流願回瀼患思民撫常使夔人知感公踏
磧年年弔千古

八陣圖

陳謙

武侯陣法洞萬古所至累石傳岷嶠意令他時人共識
不輕蜀血丹秦戈沔陽舊壘已草草道元往記空摩娑
廣都鄉名至今在鄉老相戒不敢磨八八成行被隆土
兩陣二首形無頗乾坤門戶取法象未顯奇正相交加
惟有江流魚復浦因水成勢堆平沙前方壁門儼營制
後如偃月不可俄七八為經分戟立九六為緯標鱗差
妙哉隆中先天學陣規八卦森包羅六十四陣極卦變
縱橫入出無聲牙更參禮經得深旨畫前丘井分八家

及其變動不可常玄前八佾舞象和四頭八尾法制定
四正四竒合變多紛紛紜紜未易亂渾渾沌沌誰能遮
晉家將軍最倔强到此驚見常山蛇既識端中相應法
何為征北復成訛乃知天玄與地秘竒才不世空咨嗟
緬懷牧郊釣潢客止齊步伐聲無譁陰經軍志八為用
指麾昧爽趨朝歌春秋蒐乘慚蕪率猶有魚麗叅鵠鵠
樓煩禿騎到中國紛披誰恤狐貍鬣長平埋肉滿山谷
昆陽積骸如亂麻自注孫經雜水陣華容道上宵焚葭

苟無法制驅市人參肉偃首胡定呀蠶鳧宇今此荒廢
直到分鼎成山河雜耕未盡星斗泣節制惜不開中華
觸之可勝不可敗侮亡取亂明義娥英雄相待得英衛
翻為圓陣鋪六花功成演作破陣樂八舞校隊猶餘葩
貞觀以來遽絕筆潼關散卒奔濤斜古人紙上已糟粕
況乃沙石喧江沲天公幸自惜人命約束湏湧嚴誰何
指國尋跡望千載萬雲盡鎖高嵯峨

遊東屯

關耆孫

呼船渡西瀼策馬行東屯猶有竹下屋依然柴作門林
深多鳥雀山對有猿猱世隔券猶在堂非基自存稼雲
迷曠野屏翠隨層軒土厚疑吾里溪清何處源食英金
有種飯粒玉為根蘆笋戀春渚蕨芽蕃故園山名竊諸
葛城榜為公孫雲雨峽前夢琵琶山後村留人惟野趣
隔市絕塵喧墻度鳥飛影泥留兔走痕漁樵老歲月慕
莧過朝昏槎漢我初逐梯參君暫捫車徒今附驥行列
舊同鵷休沐因閒日携持訪古原摧頽一弊節走逐雙

朱轡涼颿薄中袂佳氣浮酒樽出游有此樂相視而無
言則為樵夫嘲甚於人言煩取君古錦囊盛我浣花香
歸去待星上隨江看月翻

二月晦游東屯拜少陵像

陳邕

飛飛鳴梟啄金屋孔雀飲泉牛抵觸杜鵑喜免百巢嗔
鷓鴣強息一枝足燭天光焰幾許長日眩東極升朝陽
世人謾作詩老看肩拍呂葛心羲皇玉珂金鑰裁通籍
錦水銅梁俄浪迹兩戎磔裂甲欲洗四壁呻吟飯無喫

萍漂蓬轉客夔門
栖遲瀼西復東屯
羣峰竦壁水縈帶
有怪隴隴如周原
縱橫豺虎深狼莠
熊兒執耒驥子耨
除莠落杵未流匙
問有長安消息否
峽雲已月因冥搜
去醉洞庭湘浦秋
溪山留得金石響
定應騎氣時神遊
捫參歷井甘飛轍
端為穿花聽鳥設
簿書叢裏掣舟來
風雨聲中與春別
仰窺層閣俯平川
想見杜曲桑麻田
更起鳴酬儻可待
一彈指頃三千年

題臥龍

查篇

山顛祠貌儼丹青十載懷人為一登
隱隱故營連白帝茫茫恨水向西陵
石根蘭芷香無價雲頂松杉翠作層
人事天機古難料詩成試語定中僧

訪蘇黃遺墨

前人

檻外滔滔水崑前冉冉雲行人舟似葉
題墨蘚生紋歲月帆檣去山川楚蜀分
十年三艤棹永愧北山文

傷廢國詩

蜀僧遠公

樂極悲來數有涯歌聲纔歇便興嗟
牽羊廢主尋傾國

指鹿姦臣盡破家
丹禁夜涼空鎖月
後庭春暖漫開花
兩朝帝業空成夢
陵樹蒼蒼噪暮鴉

詠古

前人

西蜀稱天府江山秀而奇
肇開人皇世繼封軒轅支杜
宇傳艷靈怪誕良足疑
世代已云遠是非誰復知
大禹奠梁州故績昭可稽
岷嶠既云藝江漢亦東之
誰謂關塞通始自嬴秦時
豈知秦所開金牛一路岐
我登岷之椒欲和梁山詩

揚雄

戴錦

雄謂藏心於淵噫心藏矣而身獨不藏乎食新祿而投
閣心果不在於身乎莽之篡其來也漸矣曾不以太玄
卜之而擇夫間乎不可見者藏之誓不使莽涎垂鼎而
汚我之槩乎然祿薄而官也累歲不遷殆以貧故至禍
已迫而不能去乎論其世文高而行朴視孟氏焉醇大
而疵小也議者槩以投閣藐之亦過矣苟處其地何如
而藏焉曰豫

雲嶺矗玉筆錦江洄練文山川發靈氣蜀郡生子雲寂
冥性所忍雄談坐不聞墨池染奇字可但書八分法言
準論語太玄索義文始也食漢祿駸駸近妖氛天械脫
已晚投閣非其君愧之太乙杖吹噓縱殲焚執是論出
處幽蘭斷奇芬臨風重太息俗轍何紛紛

東溪驛

前人

登登山路高還下馥馥香林淺又深何處斜陽重回首

東溪寥落百年心

東溪先生
書屋也

全蜀藝文志卷十五

欽定四庫全書

全蜀藝文志卷十六

明 周復俊 編

詩

紀行

琵琶峽

梁簡文帝

由來歷山川此地獨迴還
百嶺相迂蔽千崖共隱天
橫峰時礙水斷岸或通川
還瞻已迷向直去復疑前夕
波照孤月山枝歛夜煙
此時愁緒密熒魂逝九遷

遂州南江

唐陳子昂

楚江復為客，征棹方悠悠。故人憫追送，置酒此南州。平生亦何恨，夙昔在林丘。違此鄉山別，長謠去國愁。

宿空舫峽青樹村浦

前人

的的明月水，啾啾寒夜猿。客愁浩方亂，洲浦寂無喧。憶作千金子，寧知九逝魂。虛聞事朱闕，結綬驚華軒。委別

高堂夢

集作愛

窺觐明主恩，今成轉蓬去。嘆息復何言。

再使蜀道

眇眇葭萌道蒼蒼褒斜谷煙壑爭晦深雲山共重複古
來風塵子同眩望鄉目芸閣有儒生輶車倦馳逐青春
客岷嶺白露搖江服歲月鎮羈孤山川俄集作長反復魚
遊戀深水鳥遊戀喬木如何別親愛坐去文章國蟋蟀
鳴戶庭蟪蛄網琴筑

下江向夔州

天明江霧歇洲浦棹歌來淥水逶迤去青山相向開城
臨蜀帝祀雲接楚王臺舊知巫山上遊子共徘徊

蜀道後期

前人

客心爭日月來往預期程
秋風不相待先至洛陽城

曉行巴峽

王維

際曉投巴峽餘春憶帝京
晴江一女浣朝日衆鷄鳴
水國舟中市山橋樹杪行
登高萬井出眺迴二流明
人作殊方語驚為舊國聲
無多山水趣稍解別離情

赴犍為經龍閣道

岑參

側逕轉月壁危梁透滄波
汗流出鳥道膽碎窺龍窩
驟

雨暗溪谷歸雲網松蘿屢聞羌兒笛厭聽巴童歌江路
險復永夢魂愁更多聖主幸典郡不敢嫌岷峩

初至犍為作

前人

山色軒楹內灘聲枕席間草生公府靜花落訟庭閒雲
雨連三峽風塵接百蠻到來能幾日不覺鬢毛斑

早上五盤嶺

前人

平旦驅駟馬曠然出五盤江回兩岸闢日隱羣峰攢蒼
翠煙景曙森沉雲樹寒松疎露孤驛花密藏迴灘棧道

溪雨滑畬田原草乾此行為知己不覺蜀道難

自巴東舟行經瞿塘峽登巫山最高峯晚還題

壁

李白

江行幾千里海月十五圓始經瞿唐峽遂步巫山巔
巫山高不窮巴國盡所歷日邊攀垂蘿霞外倚穹石
飛步凌絕頂極目無纖烟却顧失丹壑仰觀臨青天
青天若可捫銀漢去安在望雲知蒼梧記水辨瀛海
周遊孤光晚歷覽幽意多積雪照空谷悲風鳴森柯
歸途行欲曛

佳趣尚未歇
江寒早啼猿
松暝已吐月
月色何悠悠
清猿響啾啾
辭山不忍聽
揮策還孤舟

宿巫山

前人

昨夜巫山下
猿聲夢裏長
桃花飛綠水
三月下瞿塘
雨色風吹去
南行拂楚王
高丘懷宋玉
訪古一霑裳

早發白帝城

前人

朝辭白帝彩雲間
千里江陵一日還
兩岸猿聲啼不住
輕舟已過萬重山

桔柏渡

在昭化

杜甫

清冥寒江渡，駕竹為長橋。
竿煙濕漠漠，江水風蕭蕭。
連竿動婀娜，征衣颯飄飄。
急流鵝鷖散，絕岸鼉鼉驕。
西轅自茲異，東遊不可要。
高通荆門路，濶會滄海潮。
孤光隱顧盼，遊子悵寂寥。
無以洗心胃，前登但山椒。

飛仙閣

前人

土門山行窄，微徑緣秋毫。
棧雲闌干峻，梯石結構牢。
萬壑歌疎林，積陰帶奔濤。
寒日外淡泊，長風中怒號。
歇鞍

在地底始覺所歷高往來雜坐臥人馬同疲勞浮生有
定分飢飽豈可逃嘆息謂妻子我何隨汝曹

利州南渡

溫庭筠

澹然空水帶斜暉曲島蒼茫接翠微波上馬嘶看棹去
柳邊人歇待船歸數蘂沙草羣鷗散萬頃江田一鷺飛
誰解乘舟尋范蠡五湖煙水獨忘機

雲安

李羣玉

灘惡黃牛吼城孤白帝秋水寒巴字急歌迴竹枝愁樹

暗荆王館雲昏蜀客舟
瑤姬不可見行雨在高丘

遊蜀

鄭谷

所向明知是暗投
兩行清淚雨前流
雲橫新塞遮秦甸
花落空山入閬州
不分黃鸝驚夢曉
唯應杜宇信春愁
梅黃麥綠無歸處
可得漂漂愛浪遊

題嘉陵驛

武元衡

悠悠風旆繞山川
山驛空濛雨似煙
路半嘉陵頭已白
蜀門西更上青天

駱谷

章孝標

捫雲裊棧入青冥
躡馬鈴騾傍日星
仰踏劒稜梯萬仞
下緣水岫杳千尋
山花織錦時聊看
澗水彈琴不暇聽
若比爭名求利處
尋思此路却安寧

春日遊嘉陵江

劉滄

獨泛扁舟映綠楊
嘉陵江水色蒼蒼
行看芳草故鄉遠
坐對落花春日長
曲岸危檣移渡影
暮天栖鳥入山光
今來誰識東歸意
把酒閑吟思洛陽

宿蒼溪館

前人

孤館門開對碧岑
竹窗燈下聽猿吟
巴山夜雨別離夢
秦寨舊山迢遞心
滿地莓苔生近水
幾株楊柳自成陰
空思知己隔雲嶺
鄉路獨歸春草深

曉發

唐求

旅館候天曙
整車趨遠程
幾處晚鐘斷
半橋殘月明
沙上鳥猶在
渡頭人未行
去去古時道
馬嘶三兩聲

舟行夜泊夔州

前人

維舟鏡面中迴對白鹽峰夜靜沙堤月天寒水寺鐘故園何日到舊友幾時逢欲作還家夢青山一萬重

發邛州寄友人

前人

茫茫驅一馬自嘆又何之出郭見山處待船逢雨時曉鷄鳴野店寒葉墮秋枝寂寞前程去閒吟欲共誰

過黃牛峽

張蠩

黃牛來勢瀉巴川疊日孤舟逐峽前雷電夜驚猿落樹波濤秋恐客離船盤渦逆入嵌空地斷壁高分繚繞天

多少人經過此去一生魂夢怕潺湲

入蜀

劉義

望空問真宰此路為誰開峽色侵天去江聲滾地來孔
明深有意鍾會亦何才信此非人事悲歌付一杯

赴資陽經岷峽漢水所出元和三年已授此官

羊士諤

寧辭舊路駕朱轡重使疲人感漢恩今日鳴騶到岷峽
還勝博望至河源

題劒門

李德裕

奇峰百仞懸清眺，出嵐烟迴若戈回。
日高疑劒倚天參，差霞壁聳合沓翠。
屏連想是三刀夢，森然在目前。

出蜀門

歐陽詹

北客今朝出蜀門，脩然領得入詩魂。
遊人莫道歸來易，三不曾聞古老言。

初入漢州

韋莊

北僮初到漢州城，井邑樓臺觸目驚。
松檜影中旌旆色，

菱荷風裏管絃聲人心不似經離亂天意何知却太平
三日醉眠金鴈驛臨岐無限眼波橫

蒼溪縣寄揚州兄弟

元稹

蒼溪縣下嘉陵水入峽穿江倒海流憑仗鯉魚將遠信
鴈回時節到揚州

題天竺驛

偽蜀太后徐氏

為尋靈境散幽情千里江山暫得行却恨烟光看未足
便驅金翠入龜城

題天苴驛

太妃徐氏

翠驛紅亭近玉京夢魂猶自在青城
比來出看江山景
儘被江山看出行

萬州

自此後登陸
州號南浦郡

宋范成大

晨炊維下巖晚酌檣南浦波心照州榜
雲脚響衙鼓前
山如屏牆得得正當戶西江朝宗來
循屏復東去

此萬
州形

勢也惟觀歷者
當知此言之工

官曹倚巖樓市井喚船渡瓦屋仄石磴

猿啼聞人語剔核杏餘酸連枝茶膳苦窮鄉固瘠薄陋

俗亦寒窶

土人賣杏皆先剔其核取仁以爲藥也土茶甚苦不簡枝葉雜菜莢煎之

營營

謀食艱寂寂懷輒訴昔聞吏隱名今知吏隱處

邛邛驛

前人

暮雨連朝雨長亭又短亭今朝騎馬怯平日繫船聽竹葉垂頭碧秧苗滿意青濃疇方可望客路敢遑寧

遂寧府始見平川喜成短歌

前人

峽之西遂之東更無平地二千里惟有高山三萬重不知誰人鑿混沌獨此融結何其工我本吳江弄水月忽

來踏徧西南峰不知塵界在何許但怪星辰浮平空直
疑飛入蝶夢境此豈應有行人蹤今朝平遠見城郭云
是東川軍府雄原田坦若看掌上沙路淨如行鏡中茅
區粟隴潤含雨楮林竹徑涼生風將士驩呼馬蹄快康
莊直與錦里通半年崎嶇得夷路一笑未暇憐飄蓬

新津道中

前人

雨後郊原淨村村多好音宿雲浮竹色清溜走檻陰曲
沼擎青蓋新畦藝綠針江天空濶處不受暑光侵

峨眉縣

縣出符文布婦女人人績麻且行且觀田家束蒿燃于門口為香氣以迎客

前人

窮鄉未省識旌旄
鷄犬矚呼巷陌騷
村媪聚觀行績布
野翁迎拜蹠燃蒿
泉清土沃稻芒早
縣古林深槐癭高
珍重里儒來獻頌
盛言千載此丘遭

過江津縣不暇稍船

前人

西風扶櫓似乘槎
水濶灘沈浪不花
夢裏竹間喧急雪
覺來船底滾鳴沙

夔門即事

自東川入峽路至恭州便有瘴俗矣岸山悉庳下入夔界山皆傑然連三

峽夔水不可飲取之卧龍十里之外雲安麴米春自唐以來稱之今夔酒乃不佳

前人

峽行風物不堪論
裨暑驕陽雜瘴氛
人入恭南多附贅
山從夔子盡侵雲
竹枝舊曲元無調
麴米新竊但有聞
試覓清泠一杯水
筒泉須自臥龍分

刺湔淖

前人

湔淖盤渦之大者
峽江水壯則有之
或大如

一間屋相傳水行峽底遇暗石則潰起已而
下旋為渦然亦未嘗有定處或無故突然而
作巨測也舟行遇之小則歌傾大則與齎俱
入險惡之名聞天下

峽江饒暗石水狀日千變不愁灘瀧來但畏潰淖見人
言盤渦耳夷險顧有問仍於非時作未可一理貫安行
方巖穀無事忽翻練突如湯鼎沸翕作茶磨旋勢迫中
成窪怒霧外始暈已定稍安慰儻作更驚眩漂漂浮沫

起疑有潛鯨喚勃勃駭浪騰復恐蟄鰲扞篙師瞪視
灘戶呀雨汗浚巡怯大敵勇往決鏖戰幸免與齎入還
憂似蓬轉驚呼招竿折奔救竹竿斷九死船頭爭萬夫
石上牽旁觀兢薄冰撒過捷飛電前余叱馭來山險固
嘗徧今者擊楫逝豈復憚波面澎澎三峽長颭颭一葦
亂既微掬指忙又匪科頭慢天子賜之履江神散吾玩
但催疊鼓轟往助雙槳健

涪州江險不可泊入黔江棹舟
前人

黃沙翻浪攻排亭濱淖百尺呀成坑坳窪眩轉久乃平
一渦熨帖千渦生篙師絕叫歐川靈鳴銃飛渡如奔霆
水從岷來如濁涇夜榜黔江聊濯纓玻瓈徹底鏡面清
忽思短棹中流橫釣絲隨風浮月明

邛邛道中

文同

驅馬下遙川殘陽促晚鞭高林夾廣道亂水入平田村
落晴如畫桑麻晝起烟飛鴻正南下歸意滿雲邊

過朝天嶺

前人

雙壁相參萬木深
馬前猿鳥亦難尋
雲容杳杳斷鴻意
風色蕭蕭行客心
山若畫屏隨峽勢
水如衣帶轉巖陰
生平來往成何事
且倚鉤欄擁鼻吟

月下船行入資州

范祖禹

憶昨卧碧山蒼蒼
叢桂間白雲為屏
石為枕綠蘿長挂
明月間忽來輕舟
泛江水山月隨人
還在此白鷺驚飛
宿靄間青山倒卧
蒼波底此時孤棹
發中流川后倚波
聽棹謳不學子猷
中夜返欲乘明月
向資州

過瀘江亭

虞允文

映水林巒影顛倒濟川舟楫勢崢嶸東行萬里欲乘興
更待一篙春水生

夔州一首

郭印

夔子巴峽衝風物異蜀境城居板作屋江汲地無井四
郊乏平原冢墓緣山嶺人傳蚯蚓瘴俗飲茱萸茗女婦
盡背籃老弱多垂癭試問何所因食彼山泉冷嵒棲固
不少亦有長細頸似聞此土人其性皆悍獷胸中忿畜

者甕盎成項領是說理有之云胡不自省我來適夏初
端坐愁日永况經六七月官舍如沸鼎有雨未沾濡蔬
茹空盤皿清泉不敢喫僅免河魚梗投紱歸去來吾鄉
等箕頽

發成都

劉望之

落拓平生載酒行如今憔悴髩絲生無金得買青樓笑
空負閒愁出錦城

欲洗羈愁只自醒郾筒酒好信虛名江陽春色論千戶

價比西州却未輕

一夜孤舟浪打頭
不容客夢到滄洲
誰言江上煙波急
未抵歸心一半流

廣都道中作

李新

萬花織籬几幾曲
繡屏處處圍
茆屋家貧張戶無羅幕
東風吹開莫吹落
居人應笑行客癡
春去春歸總不知

琅璫驛

今之上亭鋪

邵清叔

弄臣寧復解輸忠
偶契琅璫一語中
富貴易忘貧易感

西來方憶曲江公

暑行憩新都驛

陸游

細細黃花落古槐
江皋不雨轉輕雷
長空鳥破滄洲去
落日人從綠野來
散策意行尋水石
脫巾高卧避氛埃
羈遊每羨端居好
看月房湖又一回

早發新都驛

前人

喔喔江村鷄迢迢縣門漏
河漢縱復橫繁星明若晝
愛涼趣上馬未曉閱兩候
高林起宿鳥絕澗落驚狖寺樓

揅蒼壑沙泉瀉幽竇我行忽萬里坐嘆關河富官如廣
文冷面作拾遺瘦今年曷歸哉勿落春鴈後

自漢州之金堂過沈氏竹園小憩坐間微雨

前人

修修萬竹壓康莊碧玉椽圍一尺強雪節煙梢誰暇賞
馬蹄車轍可憐忙帽邊忽墮吹香句肘後舊傳醫俗方
更覺清遊天所惜坐來飛雨度橫塘

馬上微雨

前人

三日觸毒暑衣垢背汗浹今旦殊蕭然涼雨吹醉頰瘦
松無橫枝蠹竹少全葉渚蓮乃可念汝泣如放妾豈惟
人意適我馬亦振鬣遠村有歸人清溪爭晚涉

彌牟鎮驛舍小酌

前人

郵亭草草置盤盂買果烹蔬便有餘自許白雲終醉死
不論黃紙有除書角巾墊雨蟬聲外細葛含風日落初
行遍天涯身尚健却嫌陶令愛吾廬

九月十日如漢州小獵於新都彌牟之間投宿

民家

前人

適從邛州歸又作漢州去天低慘欲雪遊子悲歲暮十
年辭京國疋馬厭道路野火炎高岡江雲暗空戍角弓
寒始勁霜鶻飢更怒邂逅成小獵尺箠聊指呼北連武
侯祠南並稚子墓合圍蹙窮鹿設伏截狡兔壯哉帶箭
雉耿介死不顧吾寧暴天物戰法因得寓黃昏過民家
休馬燎裘袴割鮮盛燔炙毛血洒庭戶老姥亦復奇訊
掃邀我駐丈夫倘未死千金酬此遇

自廣漢歸宿十八里草市

前人

月黑叩店門燈青坐床簀飯麤雜沙土菜瘦等草棘泰
然均一飽未覺異玉食我豈兒女哉口腹為怨德古人
恥懷祿不仕當力穡從今扶犁手終老謝翰墨

過笨橋道中龍祠小留

前人

江邊龍祠何年作白浪花中挿朱閣朝暾漸上宿霧收
喜氣已動晨霜薄我來倚闌一悵然蘆花滿空如柳綿
安得身為雙白鷺飛上灘頭却飛去

玻璆江

眉州共飲亭

前人

玻璆江水千尺深不知江上離人心
君行未過青衣縣
妾心先到峨眉陰
金尊共酌不知曉
月落煙渚天橫參
車輪無角留不住
馬蹄不方何處尋
空憑尺素寄幽恨
縱有綠綺誰知音
愁來只欲掩屏睡
無奈夢斷聞疎砧

瑞草橋道中作

在眉州

經年簿書無少暇
款段今朝欣一跨
瑞草橋邊水亂流
青衣渡口山如畫
老翁醉著看龍鍾
小婦出窺聞姪姪

荒陂吹笛晚呼牛
古路倚梯晨採柘
殘花零落不禁折
香草丰茸如可藉
郵亭慈竹筍穿籬
野店蒲萄枝上架
功名垂世端有待
利欲昏心喜乘罽
羈窮自笑豈人謀
閒放每欲從天借
草根蟲語祇自悲
風裏蓬征安稅駕
祖師補處浣花村
會傍清江結茅舍

豐橋旅舍作

在西門

我是山林人心期在塵
表出門消底物兩屨萬事了羣
兒何足愠為爾常悄悄
今朝山中路更喜相識少三义

市人醉爭席豐橋逆旅留饋食小婦髻鬟高一尺梭聲
軋軋當戶織

柳林酒家小樓

桃花如燒酒如油緩轡郊原常自遊微倦放教成午夢
宿醒留得伴春愁遠塗始悟乾坤大晚節偏驚歲月遒
記取清明米州路半天高柳出青樓

自成都回

元虞集

還鄉思速去鄉遲王事相縻散後期里父留看題壁字

山僧打送捨田碑胡桃筇竹南方要盧橘杞上國知
此日君親俱在望徘徊三顧欲何之

過黃陵廟

李于村

黃陵廟前湘水綠天寒漁郎唱巴曲沙棠舟上月蒼蒼
翠蛟白蜃江茫茫似聞清愁五十柱萬里鴻飛楓葉暮
神鴉翻舞祠門開珠裳玉袖霑莓苔玄猿晝啼蘿薜影
赤鱗夜去芙蓉冷北渚淚痕斑竹紋南風哀思蒼梧雲
山頭古桂秋露碧山下江流豈終極荒涼揭車雜杜蘅

靈風自吹煙霧旌輕帆晚向芳洲泊聊薦蘋羞奠蘭酌
沅有汜兮湘有沱洞庭水落生層波裴回獨詠騷人歌

山行

明胡子昭

剡秣尋芳徑携壺上翠微路危行客少山濶見人稀古
廟存臺址荒神著薜衣山雞元不慣驚起舍前飛
人道山行好山行最寂寥緼袍鈎棘刺草履踏松茅古
木參天秀岩泉浸石橋道人驚破膽虎嘯白猿號

永寧道中

吳伯通

步出長淵向鴈西山川渾似浣花溪渠渠活活泉聲細
澳澳青青竹色齊客路欲迷惟信馬人家不見但聞鷄
惜無杜老林中住還訪荒亭共醉題

秋林驛

楊廷和

桃花溪水繞山流半是金沙湧作洲瘠土幾灣剛有麥

平林一望更無楸

驛舊名楸林鎮改今名去木從秋

絃歌雅俗從今換

土人舊少讀書者

桑柘生涯不外求好寺欲遊遊未得賞心聊

寄驛前樓

鹽亭縣

前人

幾番寓宿鹽亭縣未得閒情一賦詩土俗舊從張老變

縣人舊多氏語自張隱翁始變之

高山曾受杜陵知杜詩高山擁縣青溪深

野水流雲氣雪壓寒條帶玉枝夜向德星橋上望仰高

鄉袞有餘思

德星橋嚴舊居

鹽亭道中

前人

成都此去未為賒土俗看來亦自差驛卒裹糧多橡芋
鹽亭煮井半泥沙雲中石路依山轉澗外畬田趁水斜

剛到富村風景別竹林松徑是人家

隆山道中

前人

西水寨裳渡梯石上雲巔護持集衆力牽送引修綆盤
旋幾百折歷覽可千頃鳥飛皆下風雲過欲摩頂高樹
小於拳溪田望如井念此僕夫勤塗泥沒雙脰慚愧我
何功勞人當自省

猿山道上

前人

古店北來皆鳥道驅馳今日又猿山軟莎歇馬蹂新碧

老樹盤蛇蝕舊斑直上有天通遠近周圍無路可躋攀
勞人我亦勞神久一見郵亭一解顏

百節驛八十里

劉端

萬峯回合鎖重關車馬蕭然驛吏閒春夜不眠啼鳥靜
一溪流水響潺潺

松坎驛二首

前人

九十春光欲暮八千客路初行宇宙有人憂世江湖何
事忘情

乍雨乍晴天氣半花半鳥風光客子相看不倦詩人高
詠何妨

播南吟七首

前人

荒草猶傳李白城夜郎憔悴若為情半生豪氣隨烟水
千古詩名煥日星

水交箐裡有猿啼聽罷令人思欲迷聞說近來多虎跡
行人莫到日頭西

百折羊腸一逕危林深長見日光遲三坡險處君須記

正是行人滴淚時

小箐南頭大箐隣
箐中林木不知春
從來鬼魅多依石
自是豺狼怕近人

何人喚此老青岡
亂石磨牙險更長
百杵杵來行不到
直教行客為心忙

石虎關高似劒門
戈矛森立勢雄吞
行人過此應須恐
虎嘯猿啼白日昏


又向南溪入箐來
一聲長嘯虎羣猜
凌空石笋柴關上

却使行人望眼開

舟晚

朱珣

鷗鷺將雛護石根
莓苔綴纜雜衣痕
幾椽茅屋生春色
無數桃花燒野村
祈歲鄉儺簫鼓咽
坐風舟子嘯歌喧
蓬窗興劇誰憐我
幾點青峰映綠尊



全蜀藝文志卷十六